

Chhiu-hôa kap Tì-kiông
Kiat-hun-sek ê Chiok-sû

Tiuⁿ Hòk-chú

Sin-niû Sin-lông kap kok-ūi kùi-pin,

Tāi-ke Chhut-thâu-thiⁿ!

Tāi-ke Kiong-hí!

Góa sī Chhiu-hôa ê Tâi-gí lāu-su.

Chin hoaⁿ-hí lâi chham-ka Chhiu-hôa kap Tì-kiông khan-chhiú chò ang-bó ê kiat-hun-sek.

Góa kóng khan-chhiú sī in-ūi chit-tùi ang-bó tùi chit-tiáp khí beh chhiú khan chhiú, sim liân sim tàu-tīn lâi kiâⁿ jīn-seng ê lō. Tông-sī khan-chhiú chit-ê sū mā tāi-piáu Tâi-ôan ê chāi-tē bûn-hòa.

Lán lóng chai-iaⁿ, Tâi-ôan siā-hōe pún-chiâⁿ kan-ta tòa Gôan-chū-bîn(GCB) niâ. GCB ê siā-hōe sī bó-hē ê siā-hōe, chiū-sī kóng cha-bó..ê chò chú-thé. Chāi-sán mā sī cha-bó..ê ê.Só-í lán Tâi-ôan-ōe ū kóng, chit-ê bó, kah iâⁿ kòe saⁿ-ê thiⁿ-kong-chó; bó-tōa-chí, chē kim-kau-í; thiaⁿ bó chhui, tōa hù-kùi! Che ē-tàng khòaⁿ tiòh Tâi-ôan lāng tùi lú-sèng ê tùi-tiông. Khan-chhiú gôan-lâi ê ì-sù sī, GCB cha-bó gín-á chhōe tiòh kah-ì ê cha-pō lāng, kā i khan-chhiú tng-khì hō pē-bó khòaⁿ. Iàu-kiū pē-bó ín-chún chhōa i chò khan-chhiú. Án-ne lán chiū chai-iaⁿ, sī lú-sèng chhōa lâm-sèng chò khan-chhiú. Tong-jiân, chit-má lú-lâm pêng-téng, kóng-chò sī kiat-hun. Che piáu-sī lán ū chìn-pō.

Chhiu-hôa tòe góa òh Tâi-gí kap bó-gí kàu-hák ū 1-nī kú. Góa ū chù-ì tiòh i chin jīn-chin hák-síp. Tī òh siá Tâi-gí bûn-chiuⁿ ê tióng-kan, i mā chhim-chhim kám-kak tiòh Tâi-ôan-lāng chin ték-piát ê kám-chêng. I hoat-hiân Tâi-ôan lāng lóng teh thè pát-lāng siat-sióng. Lóng kā ka-kī ê khòai-lók kap hēng-hok khng tī piⁿ..a. Góa tùi i chiah-nih kín chiū ē-tit-thang chiah-nih chhim-khek jīn-sek Tâi-ôan lāng ê sèng-keh, chin khim-phòe. Góa mā kā kiàn-gī ka-kī ê khòai-lók kap hēng-hok mā ài tâng-chê khó-lī. Án-ne chiah ū thò-tông. Sui-jiân beh kiat-hun chin bô êng, Chhiu-hôa mā poah sī-kan koh teh chham-ú Ko-hiông Lô-má-jī Gián-síp-hōe bāng-iah siat-kè ê kang-thêng. Hō góa hui-siông kám-sim. Siong-sìn Chhiu-hôa āu-pái tī hák-hāu ê bó-gí kàu-hák ē chò kàu chin kiát-chhut, chin sêng-kong.

Tī chia góa beh chiok-hok chit-tùi sin-lâng, kám-chêng éng-óan tiⁿ but-but, ka-têng hêng-hok, sū-giáp sêng-kong, chá-jit tit kùi-chú. Lán lóng chin chai, hun-in ê lō-tô lò-lò-tng, hun-in ê seng-óah mā m̄-sī ták-kang lóng sio-kāng hiah-nih tiⁿ-bit; tiāⁿ-tiòh sī ē ū-sī hó-thiⁿ, ū-sī σ-im; ū-sī thàu-hong, ū-sī lóh-hō; ū-sī mā ē hong-thai tōa-chúi, hōan-sè ū-sī mā ē tē-tāng, hōan-sè soaⁿ-pang tē-líh! Chóng-sī ang-á-bó tiòh ài hō-siōng thé-liōng, hō-siōng thiàⁿ-sioh; hō-siōng chun-tiōng, hō-siōng him-sióng. Che thang kóng sī ang-bó chò-hóe siōng kài iàu-kín ê 16 jī chin-giân! Siong-sìn chit-tùi sin-lâng ê hun-in seng-óah it-tēng ē chin ôan-bóan, chin hêng-hok.

To-siā.



Ló-lát.